



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

ODLUKA
O IZMJENAMA I DOPUNI ODLUKE O UPOTREBI GRBA,
IMENA I ISTICANJU ZASTAVE GRADA SARAJEVA
(Prijedlog)

Predlagač: Gradonačelnica
Obradivač: Gradska služba za opću upravu
i zajedničke poslove

Sarajevo, april 2024. godine

Adresa: Hamdije Kreševljakovića 3
71 000 Sarajevo
Tel.: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 16. stav (3) Zakon o privrednim društvima („Službene novine Federacije Bosne i Hercegovine“, br. 81/15 i 75/21), člana 10. Zakona o udruženjima i fondacijama („Službene novine Federacije Bosne i Hercegovine“, broj 45/02) i člana 31. Statuta Grada Sarajeva („Službene novine Kantona Sarajevo“, broj 7/23), Gradsko Vijeće Grada Sarajeva, na __. sjednici održanoj dana __. __. 2024. godine, donijelo je:

(Prijedlog)

**ODLUKU
O IZMJENAMA I DOPUNI ODLUKE O UPOTREBI GRBA,
IMENA I ISTICANJU ZASTAVE GRADA SARAJEVA**

Član 1.

U Odluci o upotrebi grba, imena i isticanju zastave Grada Sarajeva („Službene novine Kantona Sarajevo“, broj 05/06 – prečišćeni tekst, br. 33/07 i 25/19) (u daljnjem tekstu: „Odluka“), u članu 7. mijenja se stav (1) i isti glasi:

„Upotreba imena Grada Sarajeva može se odobriti pravnim i fizičkim licima radi unošenja u firmu, odnosno naziv pravnog lica, radi unošenja u naziv proizvoda i naziv domena, ako njihova djelatnost, odnosno aktivnosti ne narušavaju ugled Grada Sarajeva i doprinosi njegovoj afirmaciji.“

Član 2.

U članu 8. mijenja se stav (2) i isti glasi:

„Uvjeti za odobravanje upotrebe grba Grada Sarajeva procjenjuju se u svakom konkretnom slučaju na osnovu tehničkog opisa (skice), svrhe upotrebe grba, kao i dokumenata koja se odnose na rad i djelatnost pravnog lica.“

Stav (3) člana 8. se briše.

Član 3.

Član 11. mijenja se i glasi:

„Rješenje o upotrebi grba i imena Grada Sarajeva može se ukinuti ako se grb ili ime upotrebljava protivno izdatim odobrenjima, odnosno ako se utvrdi da pravno lice svojom djelatnošću ili na drugi način šteti ugledu Grada Sarajeva.“

Član 4.

U članu 12. mijenja se stav (2) i glasi:

„Izuzetno, javnim preduzećima i drugim pravnim licima čiji osnivač je Grad Sarajevo, kao i pravnim licima čija djelatnost nije usmjerena na sticanje dobiti, a čija djelatnost je od posebnog društvenog interesa za Grad Sarajevo ili su proglašena udruženima od posebnog značaja za Grad Sarajevo, upotreba grba i imena Grada Sarajeva može se odobriti bez novčane naknade.“

Član 5.

U članu 16. dodaju se nove tačke f) i g) i iste glase:

„f) lista osiguranih lica izdata od strane Porezne uprave.

g) tehnički opis (skica) upotrebe grba i naznačena svrha upotrebe.“

Član 6.

Član 17. mijenja se i glasi:

„Pravnim licima koja ostvaruju prihod do 1.000.000,00 KM utvrđuje se godišnja naknada za upotrebu imena u iznosu od 720,00 KM.

Pravnim licima koja ostvaruju prihod od 1.000.001,00 KM do 10.000.000,00 KM utvrđuje se godišnja naknada za upotrebu imena u iznosu do 1.200,00 KM.

Pravnim licima koja ostvaruju prihod viši od 10.000.000,00 KM utvrđuje se godišnja naknada u iznosu od 4.800,00 KM.

Fizičkim licima kojima je odobrena upotreba imena Grada Sarajeva u nazivu domena, utvrđuje se godišnja naknada u iznosu od 250,00 KM.

Pravnim licima čija djelatnost nije usmjerena na sticanje dobiti, utvrđuje se godišnja naknada za upotrebu grba ili imena Grada Sarajeva u iznosu od 100,00 KM.“

Član 7.

Član 18. mijenja se i glasi:

„Pravno lice kojem je odobrena upotreba grba ili imena Grada Sarajeva dužno je odmah obavijestiti donosioca rješenja o eventualnim statusnim promjenama, prestanku rada, kao i svim drugim promjenama koje se odnose na ispunjavanje svrhe za davanje odobrenja za upotrebu grba ili imena.

Pravno lice kojem je odobrena upotreba grba ili imena Grada Sarajeva je dužno, na zahtjev donosioca rješenja, a u svrhu periodične provjere ispunjavanja uslova i kriterija za utvrđivanje naknade po osnovu upotrebe grba ili imena Grada Sarajeva, dostaviti svu potrebnu dokumentaciju iz člana 16. ove odluke u roku koji ne može biti duži od 30 dana.“

Član 8.

Ova odluka stupa na snagu narednog dana od dana objavljivanja u „Službenim novinama Kantona Sarajevo“.

PREDSJEDAVAJUĆI GRADSKOG VIJEĆA

Jasmin Ademović

Broj:

Sarajevo, __. __. 2024. godina

OBRAZLOŽENJE

PRAVNI OSNOV

Pravni osnov za donošenje ove Odluke sadržan je u odredbi člana 16. stav (3) Zakon o privrednim društvima („Službene novine Federacije Bosne i Hercegovine“, broj 81/15) kojom je propisano da firma može sadržavati naziv kantona, grada i općine i njihove izvedenice i skraćenice samo na osnovu odobrenja nadležnog kantonalnog, gradskog, odnosno općinskog organa određenog posebnim zakonom na području na kojem društvo ima sjedište. Pravni osnov je sadržan i u članu 10. Zakona o udruženjima i fondacijama („Službene novine Federacije Bosne i Hercegovine“, broj 45/02) kojim je propisano da se u naziv udruženja, odnosno fondacije ne mogu unositi nazivi grada i općine bez odobrenja gradonačelnika, odnosno općinskog načelnika. Članom 31. Statuta Grada Sarajeva („Službene novine Kantona Sarajevo“, broj 7/23) propisano je da Gradsko Vijeće Grada Sarajeva donosi odluke, druge propise i opće akte i daje njihovo tumačenje te je nadležno za upravljanje i raspolaganje imovinom Grada Sarajeva.

RAZLOZI DONOŠENJA

Odlukom o upotrebi grba, imena i isticanju zastave Grada Sarajeva („Službene novine Kantona Sarajevo“, broj 05/06 – prečišćeni tekst, broj 33/07 i broj 25/19) utvrđeni su uslovi i način upotrebe grba, imena i isticanju zastave Grada Sarajeva i propisan je način evidentiranja odobrenja za upotrebu grba i imena Grada Sarajeva. Istom Odlukom utvrđeni su i kriteriji za utvrđivanje naknade po osnovu upotrebe grba ili imena Grada Sarajeva.

Uzimajući u obzir da je od donošenja Odluke prošao relativno dug vremenski period, a da su u periodu primjene Odluke nastajale situacije u kojima je potrebno preciznije regulirati način i kriterije za utvrđivanje naknade, pristupilo se donošenju Odluke o izmjenama i dopuni Odluke o upotrebi grba, imena i isticanju zastave Grada Sarajeva. Također, potrebno je propisati mogućnost periodične provjere ispunjavanja uslova i kriterija za utvrđivanje naknade po osnovu upotrebe grba ili imena Grada Sarajeva, obzirom da je uočeno da pravna lica kojima se odobri upotreba grba ili imena Grada Sarajeva ne obavještavaju donosioca rješenja o eventualnim statusnim promjenama, prestanku rada, kao i svim drugim promjenama koje se odnose na ispunjavanje svrhe za davanje odobrenja za upotrebu grba ili imena, a koja obaveza je sadržana u rješenjima kojima je odobrena upotreba.

Programom rada Gradskog vijeća Grada Sarajeva za 2024. godinu planirano je razmatranje Prijedloga Odluke o izmjenama i dopuni Odluke o upotrebi grba, imena i isticanju zastave Grada Sarajeva na aprilskoj sjednici.

Nacrt Odluke o izmjenama i dopuni Odluke o upotrebi grba, imena i isticanju zastave Grada Sarajeva razmatran je na februarskoj sjednici Gradskog vijeća Grada Sarajeva, te je u skladu sa Zaključkom Gradskog vijeća Grada Sarajeva broj: 01-GV-02-329/24 od 31.02.2024. godine provedena javna rasprava na Nacrt Odluke o izmjenama i dopuni Odluke o upotrebi grba, imena i isticanju zastave Grada Sarajeva. Izvještaj sa provedene javne rasprave dat je u prilogu.

FINANSIJSKA SREDSTVA

Sredstva za realizaciju ove odluke nisu potrebna.

**IZVJEŠTAJ O PROVEDENOJ JAVNOJ RASPRAVI
NA NACRT ODLUKE O IZMJENAMA I DOPUNI ODLUKE O UPOTREBI GRBA, IMENA
I ISTICANJU ZASTAVE GRADA SARAJEVA**

U skladu sa Zaključkom Gradskog vijeća Grada Sarajeva broj: 01-GV-02-329/24 od 31.02.2024. godine, provedena je javna rasprava na Nacrt Odluke o izmjenama i dopuni Odluke o upotrebi grba, imena i isticanju zastave Grada Sarajeva.

Pozivi za učešće u javnoj raspravi su, u skladu sa navedenim Zaključkom, upućeni sljedećim subjektima:

- Klubovima vijećnika u Gradskom vijeću Grada Sarajeva,
- Federalno ministarstvo pravde,
- Ministarstvo pravde i uprave Kantona Sarajevo,
- Općinama u sastavu Grada Sarajeva,
- Linkom na web stranici Grada Sarajeva svim zainteresovanim subjektima,
- Primjedbe, prijedlozi i sugestije iznesene u diskusijama radnih tijela Gradskog vijeća i gradskih vijećnika, iznesene na sjednici Gradskog vijeća pri razmatranju Nacrta Odluke, tretirani su kao prilog javnoj raspravi.

Javna rasprava je trajala 20 dana.

U javnoj raspravi učešće je uzelo Ministarstvo pravde i uprave Kantona Sarajevo

MINISTARSTVO PRAVDE I UPRAVE KANTONA SARAJEVO

Ministarstvo pravde i uprave analiziralo je dostavljeni Nacrt Odluke o izmjenama i dopuni Odluke o upotrebi grba, imena i isticanju zastave Grada Sarajeva i ističe sljedeće prijedloge, primjedbe i sugestije:

1. Članom 1. nacrta Odluke mijenja se član 7. stav (1) na način da se predviđa, pored pravnih lica, upotreba imena Grada Sarajeva od strane i fizičkih lica.

S tim u vezi predlažemo da se u članu 2. Nacrta Odluke, kojom se mijenja član 8. stav (2), proširi upotreba grba Grada Sarajeva također na fizička lica.

Obrazloženje:

Predložena izmjena nije precizna i jasna. Naime, ovako predložena izmjena stava (2) propisuje uvjete koje treba ispuniti pravno lice, dok se fizičko lice ne spominje, a u stavu (1) člana 8. Odluke propisuje: „o zahtjevu za upotrebu grba i imena Grada Sarajeva rješava gradonačelnik Grada Sarajeva na prijedlog nadležne službe i u skladu sa kriterijima za utvrđivanje naknade po osnovu upotrebe grba ili imena Grada Sarajeva“. Dakle, ne pravi se razlika u pogledu rješavanja o upotrebi imena ili grba.

Iz navedene odredbe proizilazi da fizičko lice ili ne treba posjedovati tehnički opis (skicu) u svrhu upotrebe grba (ili ne može koristiti grb) ili se ti uslovi ne odnose za fizičko lice, a onda se odobrava upotreba grba za fizičko lice vrši na osnovu diskrecione odluke gradonačelnika Grada

Sarajeva što može dovesti do nejednakog postupanja za fizička lica, posebno imajući u vidu da je nacrtom Odluke predviđena i godišnja naknada fizičkom licu u članu 6. nacarta Odluke.

Stav predlagača:

Članom 7. Odluke o upotrebi grba, imena i isticanju zastave Grada Sarajeva („Službene novine Kantona Sarajevo“, broj 05/06 – prečišćeni tekst, broj 33/07 i 25/19) bilo je predviđeno da se upotreba imena može odobriti isključivo pravnom licu.

Međutim, obzirom na činjenicu da je od donošenja Odluke do danas došlo do niza izmjena te da je utvrđeno da se ime Grada Sarajeva, pored propisanih svrha, može koristiti i u druge svrhe koje nisu obuhvaćene postojećom Odlukom, predložena je izmjena naprijed navedenog člana na način kako je to učinjeno Nacrtom Odluke o izmjenama i dopuni Odluke o upotrebi grba, imena i isticanju zastave Grada Sarajeva.

Predlagač je izmjenu da se upotreba imena, pored pravnih lica, može odobriti i fizičkim licima, temeljio prevashodno na činjenici da se odobrenje za upotrebu imena Grada Sarajeva u nazivu domene može odobriti i pravnim i fizičkim licima.

Uzimajući u obzir prethodno, članom 1. Nacarta Odluke o izmjenama i dopuni Odluke o upotrebi grba, imena i isticanju zastave Grada Sarajeva propisuje se da se upotreba imena Grada Sarajeva može odobriti pravnim i fizičkim licima radi unošenja u firmu, odnosno naziv pravnog lica, radi unošenja u naziv proizvoda i naziv domena, ako njihova djelatnost, odnosno aktivnosti ne narušavaju ugled Grada Sarajeva i doprinosi njegovoj afirmaciji.

Za razliku od upotrebe imena, članovima 4., 5. i 6. Odluke o upotrebi grba, imena i isticanju zastave Grada Sarajeva propisano je da se upotreba grba kao zaštićenog žiga, nezaštićenog žiga, kao amblema ili ukrasa, može odobriti isključivo pravnim licima, a koje odredbe nisu mijenjane Nacrtom Odluke o izmjenama i dopuni Odluke o upotrebi grba, imena i isticanju zastave Grada Sarajeva, iz čega proizilazi da se upotreba grba ne može odobriti fizičkim licima, iz kojeg razloga se **prijedlog iznesen u tački 1. ne prihvata.**

2. U članu 6. nacarta Odluke, kojim se mijenja član 17. Odluke, smatramo da rasponi u st. 1., 2. i 3. nisu jasni i precizni, te može doći do različitog tumačenja i preklapanja, stoga sugerišemo da se rasponi propišu jasno i precizno, a u skladu sa članom 34. Pravila i postupaka za izradu zakona i drugih propisa („Službene novine Federacije Bosne i Hercegovine“, broj 71/14) koji propisuju da terminologija korištena u propisima mora biti jasna, dosljedna, precizna i potrebna.

Obrazloženje:

Konkretno, predlažemo da se rasponi propišu na način da se zna najniži iznos i najviši iznos i broj radnika za svaki od prva tri stava člana 17. Odluke.

Stav predlagača:

Prijedlog iznesen u tački 2. se prihvata obzirom da je detaljnom analizom predloženog člana utvrđeno da se kriteriji preklapaju i da je moguće da će tokom primjene doći do različitog tumačenja.

Kao kriterij za utvrđivanje visine godišnje naknade utvrđuje se precizno utvrđen raspon između najnižeg i najvišeg iznosa prihoda koje pravno lice ostvaruje, dok je kriterij koji se odnosio na broj uposlenih izbrisan zbog mogućnosti nepoklapanja iznosa prihoda i broja uposlenih u situacijama kada bi iznos prihoda i broja uposlenih bili precizno određeni.



Bosnia and Herzegovina
Federation of Bosnia and Herzegovina
CANTON SARAJEVO
Ministry of Justice and Administration

Broj: 03-04/2-02-8170/24
Sarajevo, 12.03.2024. godine

19-03-2024
04-04-2228-3/24
18.03.24
Handwritten signature and initials

GRAD SARAJEVO
gđa. Senada Kočan, pomoćnica gradonačelnice
za opću upravu i zajedničke poslove
ul. Čemaluša, br. 9
71000 Sarajevo

PREDMET: Primjedbe, prijedlozi i sugestije na nacrt Odluke o izmjenama i dopuni Odluke o upotrebi grba, imena i isticanju zastave Grada Sarajeva, dostavlja se -

Veza: Vaš akt, broj: 04-04-2228-3/24 od 05.03.2024. godine

Ministarstvu pravde i uprave Kantona Sarajevo dostavljen je nacrt Odluke o izmjenama i dopuni Odluke o upotrebi grba, imena i isticanju zastave Grada Sarajeva koji je utvrdilo Gradsko vijeće Grada Sarajeva dana 21.02.2024. godine i uputilo ga u javnu raspravu u trajanju od 20 dana.

S tim u vezi, Ministarstvo pravde i uprave je analiziralo dostavljeni nacrt Odluke o izmjenama i dopuni Odluke o upotrebi grba, imena i isticanju zastave Grada Sarajeva (u daljem tekstu: nacrt Odluke) i ističemo slijedeće prijedloge, primjedbe i sugestije:

1. Članom 1. nacrta Odluke mijenja se član 7. stav (1) na način da se predviđa, pored pravnih lica, upotreba imena Grada Sarajeva od strane i fizičkih lica.
S tim u vezi predlažemo da se u članu 2. nacrta Odluke, kojom se mijenja član 8. stav (2), proširi upotreba grba Grada Sarajeva također na fizička lica.

Obrazloženje:

Predložena izmjena nije precizna i jasna.

Naime, ovako predložena izmjena stava (2) propisuje uvjete koje treba ispuniti pravno lice, dok se fizičko lice ne spominje, a stavom (1) člana 8. Odluke propisuje se da „o zahtjevu za upotrebu grba i imena Grada Sarajeva rješava gradonačelnik Grada Sarajeva na prijedlog nadležne službe i u skladu sa kriterijima za utvrđivanje naknade po osnovu upotrebe grba ili imena Grada Sarajeva“. Dakle, ne pravi se razlika u pogledu rješavanja o upotrebi imena ili grba.

Iz navedene odredbe proizilazi da fizičko lice ili ne treba posjedovati tehnički opis (skicu) i svrhu upotrebe grba (ili ne može koristiti grb) ili se ti uslovi ne odnose za fizičko lice, a



onda se odobravanje upotrebe Grba za fizičko lice vrši na osnovu diskrecione odluke gradonačelnika Grada Sarajevo što može dovesti do nejednakog postupanja za fizička lica, posebno imajući u vidu da je nacrtom Odluke predviđena i godišnja naknada fizičkom licu u članu 6. nacrta Odluke.

Smatramo da je potrebno član 8. stav (2) nacrta Odluke proširiti na fizička lica ili novim stavom propisati posebne uvjete koje mora ispuniti fizičko lice za upotrebu grba Grada Sarajeva.

2. U članu 6. nacrta Odluke, kojim se mijenja član 17. Odluke, smatramo da rasponi u st. 1., 2. i 3. nisu jasni i precizni, te može doći do različitog tumačenja i preklapanja pa sugerišemo da se rasponi propišu jasno i precizno, a u skladu sa članom 34. Pravila i postupaka za izradu zakona i drugih propisa („Službene novine Federacije Bosne i Hercegovine“, broj 71/14), koji propisuju da terminologija korištena u propisima mora biti jasna, dosljedna, precizna i potrebna.

Obrazloženje:

Konkretno, predlažemo da se rasponi propišu na način da se zna najniži iznos i najviši iznos i broj radnika za svaki od prva tri stava člana 17. Odluke.

S poštovanjem,

Dostaviti:

1. Naslovu;
2. a/a.

